

EVROPA.

EVROPA vnde hoc nomen acceperit, neque quis nominis auctor extiterit, ab aliquo mortalium compertum est, nisi quod dicimus ab Europa Tyria nomen accepisse Regionem, inquit Herodotus libro quarto. Hanc Plinius altricem victoris omnium gentium populi, terrarumque pulcherrimam nominat. Asiae & Africæ aliquando non magnitudine, sed virtute comparata. Certum est, eam, cum habitissima sit, gentium frequentia non multo alterutra inferiore esse. Huius latus Septentrionalior & Occidentalior, Oceano alluitur; Meridionale, mari Mediterraneo ab Africa seiungitur. Deinde Orientem versus mari Ægæo (nunc, Archipelago) Ponto Euxino, (hodie, mare Maggiore) Palude Meotide (hodie, mare delle Zabacche) & Isthmo, qui est à fontibus Tanais fluuij (vulgo Don) recta ad Septentrionem ab Asia dirimitur, Glareano teste. Habetque hoc modo Peninsulæ effigiem, ut ipsa in tabula videre licet. Huius caput Roma, olim totius Orbis domitrix.

Habet hæc nostra Europa, præter Romanum Imperium toto terrarum Orbe reuerendum, ultra viginti octo, si quatuordecim, quæ Damianus à Goes in sola Hispania numerat, adiunxeris, in vniuersum Regna, Christiana Religione imbuta: vnde huius Regionis dignitatem aestimare liceat.

Regio ultra modum fertilis, naturalem temperiem, cælumque satis clemens habens. Frugum omnigenum, vini, & arborum copia nullis posthabenda, sed optimis Regionibus comparanda est: adeò amœna, cultissimisque Vrbibus, pagis, & vicis exornata, ut populorum, gentiumque virtute aliis terræ partibus, & si forma minor, tamen præstantior habetur, atque semper habita fuit. Ab omnibus priscis Scriptoribus, cum ob Macedonum Imperium, tum ob Romanorum potentiam maximè celebrata. Eius laudes apud Strabonem videre licet, qui eam libro tertio, septemque sequentibus libris elegantissime describit. Vide etiam ceteros veteres Geographos. Ex recentioribus eam inter cetera describere conati sunt, Volaterranus, Seb. Münsterus, Dominicus Niger, Georgius Rithaymerus, in suis Geographiis. Sed peculiariter eam descripsérunt Pius. II., Christophorus & Ancelmus Cellæ.

Multa per vniuersam ferè Europam itineraria, locorumque distantias annotatis, litteris mandarunt, Cherubinus Stella, Iohannes Herbaceus, & Georgius Meyerus. Idem Guilielmus Gratarolus fecit in calce libri, qui inscribitur De Regimine iter agentium.



